

Imminut pilersorneq nunatsinni annertusarniarlugu Naalakkersuisut periusissiamik kingusinnerpaamik UKA 2020-imi Inatsisartunut saqqummiunneqartussamik suliaqaqqullugit peqquneqarnissaannik Inatsisartut aalajangiiffigisassaattut siunnersuut. Periusissiaq aamma inatsisitigut aningaasatigullu aporfiit nutartigassat aaqqissuuteqqinnissaannut innersuussutinik imaqassaaq.

(Inatsisartunut Ilaasortaq Múte B. Egede, Inuit Ataqatigiit)

Najukkani nunalerinikkut tunisassianik tuniniaanerup annertusarneqarnissaanut atugassarititaasut pitsaanerpaajunissaat qulakkeerniarlugu Naalakkersuisut iliussissatut pilersaarusiornissamik peqquneqarnissaannik Inatsisartut aalajangiiffigisassaattut siunnersuut. Siunissami sulinissamut piffissalersuummik iliussissatut pilersaarut imaqassaaq Inatsisartunullu kingusinnerpaamik UKA 2020-mi agguanneqassalluni.

(Inatsisartunut Ilaasortaq Stine Egede, Inuit Ataqatigiit)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Siullermeerneqarnera

Aallaqqaasiutigalugu siunnersuuteqartut Muté B. Egede aamma Stine Egede, Inuit Ataqatigiit Kalaallit Nunaanni inuussutissanik nammineq pilersornermut aammalu nunalerinermut tunngasut ullormi oqaluuserisassanngortissimammassuk Naalakkersuisut sinnerlugit qujassuteqarfigaakka.

Naalakkersuisoqatigiinnissamut isumaqatigiisummi 2018-imeersumi ima allaqqavoq:

“Naalakkersuisooqatigiit anguniarpaat nunatsinni annertunerusumik sutigut tamatigut (nukissiuuteqarnikkut, nerisaqarnikkut, imeqarnikkut, uumasuuteqarnikkut, naatitanik pilersorsinnaanikkut il.il.) imminut pilersorsinnaanerup annertusartuarnissaa”.

Najukkani ataasiakkaani inuussutissat atorluarnerunissaat ukkatarineqareerpoq. Kalaallit Nunaanni inuussutissat atorneqarnerulernissamik suliniutit siuarsarneqarnissaat eqqarsaatigalugit suliniutinut assigiinngitsunut ilaatigut nammineerluni suliniuteqartarnikkut aammalu allat suliniutaat aqutigalugit naalakkersuisoqarfik peqataasarpoq.

Suliniutit Naalakkersuisoqarfimmit toqqaanartumik peqataaffigineqartartut oqaatigineqarsinnaasut tassaapput inuussutissat pillugit aaqqissuussisarnerit assigiinngitsut soorlu qeqqussat pillugit aaqqissuussinerit, Food Festivalit, inuussutissat pillugit isumasioqatigiittarnerit aammalu inuussutissat nunatsinneersut siuarsarlugillu atorneqarnerunissaat siunertaralugu suliniutinut aningaasanik tapiissuteqartarnerit. Suliniut “Aalisagartornerugit” Kalaallit Nunaanni inuutissanik pisiniarfinit tigulluarneqarsimasup aallartinneqarnera Naalakkersuisoqarfimmit suleqataaffigineqarsimavoq. Tamatuma saniatigut kommunit Food festival-eqartitsillutik aaqqissuussisarnerini Naalakkersuisoqarfik peqataasarpoq, tassani uumasut piniarneqartartut pillugit ukiup qanoq ilinera apequtaatillugu periarfissat killilersuinerillu tassunga ilanngullugit inuussutissat pinngortitameersut ukiup qanoq ilinerani pitsaanerpaamik atorluarneqarsinnaaneri paasititsiniutigineqartarlutik.

Tamatuma saniatigut Naalackersuisoqarfik soorlu Sermersooq Business Council-ip NERISA-mik aaqquissuussisarnerini peqataasarpoq – tassani inuussutissat pillugit aaqquissuussisoqartarluni, oqallittoqartarluni kiisalu nammineq nerisassaatsinnik pissarsiniartarnerit eqqarsaatigalugit periarfissat killissallu pillugit misilittakkanik paarlaasseqatigiittoqartarlunittaaq. Aaqquissuussaq nutaaq oktobarimi novembarimilu pisussaq tassaavoq “Issittumi Igaffik Nutaaq” - ”New Arctic Kitchen” INUIT SILA aammalu KNAPK peqatigalugit ingerlanneqartussaq tassani puisit neqaasa, tutut neqaasa kiisalu umimmaat neqaasa atorneqartarnerisa ineriartortinneqarsinnaaneri nittarsaassutigineqassallutik.

Nunatsinni piniagassat anginerit aammalu aalisakkat amerlanersaat aqunneqarnissaat pillugu pilersaarutit massakut suliaqartoqalereerpoq. Assersuutigalugu tutunut, umimmannut, qilalukkanut qaqortanut qernertanullu, aavernut appanullu tunngatillugit aqutsinissamut pilersaarutit massakut suliarineqarnissaanut piareersarneqarput imaluunniit suliarineqaleruttorput. Ullumikkut aalisarnerup iluani aqutsinissaq pillugu pilersaarutit peqarpugut.

Nunalerinermut tunngatillugu inuussutissarsiummi tassani pilersaarutissaq suliarineqarpoq suliallu pineqartup ukiup massuma naannginnerani naammassineqarsinnaanissaa naatsorsuutigineqarluni. Nunalerinermi pilersaarut aqutitigalugu nunalerineq annertusarneqarlunilu ineriartortinneqassaaq, taamaasiornikkut nunalerinermik inuussutissarsiuteqartut naatitanik neqinillu pilersuinerat annertusarneqarsinnaangorlugu.

Nunalerinermik inuussutissarsiuteqartut innaallagissamik pilersuinermut nerukkaattissanillu tikisitsisarnermut aningaasartuuteqarpallaartarneq pissutigalugu aningaasatigut tatisimaneqarput. Nunalerinermik inuussutissarsiuteqartut generatorit orsutortut atorlugit innaallagissamik suli pilersortartut erngup nukinga atorlugu nukissiuuteqqanik seqerngullu qinngorneri atorlugit nukissiuutit atorlugit innaallagissamik pilersulersinnaanerisa aningaasalersorneqarsinnaaneri tamatuma kingunerisaanik pingaartillugit ukkatarineqassapput. Tamatuma saniatigut nunalerinermik inuussutissarsiuteqartut ivikkanik savaaqanillu tunisassiorsinnaanerisa qanoq isiorluni annertusarsinnaanerinut periarfissat ukkatarineqassapput, nunalerinermimmi inuussutissarsiuteqartut nerukkaattisanik annertunerusumik namminneq pilersorsinnaanerisa aammalu savat piaqqiortut ataasiakkaat neqimik tunniussaqaarsinnaanerisa annertusineqarnissaat pingaaruteqarmat.

Kalaallit Nunaanni naatitanik tunisassiorneq ineriartortinneqaleruttorpoq, ineriartortitsinerillu naatitsisartunit ataasiakkaanit namminerisamik ingerlanneqarlutik, tunisassioriaaserlu Illup Iluani naatitsineq - ”Indoor farming” Kalaallit Nunaanni atorneqalersimallunittaaq. Naatitanik tunisassiorneq pisariilluinnartumik ingerlanneqarsinnaavoq, taamaasiornikkullu Kalaallit Nunaanni naatitat pisiarineqartartut annersaat nammineq pilersornikkut ingerlanneqalersinnaalluni, pingaartumik tunisassioriaatsip Nuummit sinerissami illoqarfinnut allanut siammarterneqarneratigut. Illup Iluani naatitsineq - tunisassioriaaserli”Indoor farming” innaallagissamik annertuumik atuffiusarpoq innaallagissamillu akigitinneqartut pillugit unammilligassaqarfiulluni, naatitanimmi tunisassiornermi innaallagissamut akigititaasut aalisakkanut suliffissuarnut akigitinneqartunut sanilliullugit marloriaammik annertunerusinnaasarmat.

Siunnersuuteqartut marluullutik tamarmik immikkuullarissunik kissaateqarput nunalerinermi tunisassiorinissamut annerusumik atuinerulernissamut qanoq iliorluni pilersaarusiornissamut aamma imminut pilersornermik annertusaaniarneq pillugu periusissiamut atatillugu

assigiinngitsunik qulaajaasoqassasoq ilanngullugu suliarineqassasut. Naalakkersuisut piumassuseqarput suliniutit aallartisarneqareersut ilaatigut tunuliaqutsiullugit aammalu nunaateqarnerup ingerlanneqarnerani pilersaarusionerq ilanngullugit sulianik taamatut ittunik aallartisaassallutik.

Taamatut oqaaseqarlunga Naalakkersuisut sinnerlugit inassutigaara siunnersuutigineqartut akuersissuteqarfigineqassasut.